

Headlines

- 1 लोकसभा चुनावें दे पैहले गेढ़ लेई सियासी पार्टियों दे लीडरें आस्सेआ अपनी पार्टी दे मेदवार दे समर्थन च चुनावें प्रचार तेज होई गोआ ऐ।
- 2 सलाना श्री अमरनाथ जात्तरा इस ब'रे 29 जून थमां शुरू होग।
- 3 औंदे लोकसभा चुनावें लेई बीजेपी नै अपनी घोषणाएं गी लेइयै संकल्प पत्र जारी कीता। कांग्रेस नै इसी झूठ दा पुलिंदा दस्सेया।
- 4 चुनावें अधिकारियें, ब्लाक सतह उप्पर अफसरें गी सौ फीसद मतदान यकीनी बनाने ते मतदान कोला 5-7 दिन पैहले वोटर स्लिपां बंडने लेई आखेआ।

<><><><><>

Campaigning in Jammu Intensify

लोकसभा चुनावें दे पैहले गेढ़ दे चुनावें लेई प्रचार तेज होई गोआ ऐ। बक्ख-बक्ख सियासी पार्टियों दे नेता, मेदवारें दे समर्थन च प्रचार करा'रदे न। गृह मंत्री ते बीजेपी दे नेता अमित शाह होर, मन्हास बरादरी ग्राउंड पलौडा च ते कांग्रेस दे नेता ते पार्टी दे स्टार प्रचारक सचिन पायलट होर 16 अप्रैल गी कठुआ च अपने मेदवारें दे समर्थन च रैली करडन। पैहले गेढ़ च उधमपुर संसदी हल्के च 19 अप्रैल गी जिसले कि दुए गेढ़ च जम्मू लोकसभा हल्के दी सीट लेई 26 अप्रैल गी मतदान होग। कल यानि 15 अप्रैल गी रक्षा मंत्री राजनाथ सिंह होर डॉ. जितेंद्र सिंह हुदें हक च कठुआ जिले च बसोहली थाहर बड्डी रैली करडन। बसोहली सीट उप्पर त्रै बारी दे विधायक रेही चुके दे कांग्रेस मेदवार चौधरी लाल सिंह होर बडे शक्तिशाली मेदवार न।

<><><><><>

BJP-Congres Manifesto

भारती जनता पार्टी आस्सेआ अज्ज पार्टी सदर दफ्तर नमीं दिल्ली च अपनी चुनावी घोषणाएं उप्पर आधारित संकल्प पत्र जारी कीता गोआ। इस संकल्प पत्र च समान नागरिक संहिता, इक राष्ट्र इक चुनावें ते इक गै मतदाता सूची दा वादा कीता गोदा ऐ। एह्दे अलावा एह्दे च बीजेपी नै प्रधानमंत्री गरीब कल्याण अन्न योजना तैहत अगले 5एं बरें आस्तै मुफ्त राशन देने, आयुष्मान भारत योजना दा सीनियर नागरिकें तोड़ी विस्तार करने, त्रै करोड़ लक्खपति दीदीयां बनाने ते प्रधानमंत्री सूर्यघर योजना तैहत मुफ्त बिजली हासल कराने दे वादे कीते न। पार्टी नै भारत गी दुनिया च त्रीऽ अर्थ बवस्था बनाने ते इसी विश्व सतह उप्पर निर्माण केंद्र बनाने दा बी वादा कीता ऐ। मौके उप्पर बोलदे होई प्रधानमंत्री नरेंद्र मोदी होरें आखेआ जे एहू संकल्प पत्र नौजवानें, महिलाएं, करसानें ते गरीब गुरबे गी शक्ति प्रदान करदा ऐ जेडे इक विकसित राष्ट्र दे चार थम्म न। ताई कांग्रेस नै बीजेपी दे घोषणा पत्तर बारै आखेआ ऐ जे एहू झूठ दा पुलिंदा ऐ। नमीं दिल्ली च पत्रकारें गी संबोधित करदे होई पार्टी दी प्रवक्ता सुप्रिया श्रीनेत नै आखेआ जे बीजेपी दे इस घोषणा पत्तर च रोजगार बारै कोई योजना नेई ऐ। उनें आखेआ जे करसानें लेई एमएसपी उप्पर कनूनी गरंटी ते महंगाई उप्पर कोई गल्ल नेई कीती गेदी ऐ।

<><><><><>

Amarnath-Yatra

इस बरे दी सलाना श्री अमरनाथ जात्तरा 29 जून गी शुरू होग ते रक्खड़ पुन्नेया आले ध्याड़े 19 अगस्त गी सम्पन्न होग। श्री अमरनाथ अस्थापन बोर्ड आस्सेआ जारी इक ब्यानै च आखेआ गोआ ऐ जे इस जात्तरा लेई 15 अप्रैल थमां अगेत्रा पंजीकरण शुरू होई जाग। समुंद्री सतह थमां 3 ज्हार 888 मीटर दी ऊंचाई उप्पर स्थित श्री अमरनाथ गुफा च बर्फू दे शिवलिंग दे दर्शन आस्तै श्रद्धालु बालटाल ते पैहलगाम आले रस्तेया जात्तरा करदे न।

<><><><><>

LG-Yatra

उपराज्यपाल मनोज सिन्हा होरें अज्ज नगरोटा दे पवित्र कोल कंडोली मंदरै च श्री माता वैष्णो देवी जी प्राचीन मार्ग पवित्र 22मीं छडी जातरा दी प्रथम पूजा च हिस्सा लैता। उपराज्यपाल होरें पवित्र जोत लेइये जा'रदी छडी जातरा गी झंडी दस्सिये खाना कीता। उपराज्यपाल होरें श्रद्धालुयें गी मुमारखबाद दित्ती ते जम्मू-कश्मीर दी सुख-शांति लेई प्रार्थना बी कीती।

<><><><><><>

B.R.Ambedkar

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें अज्ज संसदभवन परिसर च डॉ. बी.आर अम्बेडकर हुंदा 134मीं जयंती उपपर उंदी प्रतिमा उपपर फुल्ल चढाइयै श्रद्धांजलि भेंट कीती। उनें इस मौके भारतीयें गी मुबारकबाद बी दित्ती।। इक सनेहू च राष्ट्रपति होरें आखेआ जे समाजिक तब्दीली आनने च आगु बाबा साहेब अम्बेडकर होरें इक कनून दां, शिक्षाविद, अर्थ शास्त्री, सियासी नेता ते समाज सुधारक दे तौर उपपर देश दे निर्माण च बेमिसाली योगदान दित्ता। धनखड़ होरें लोकें गी डॉ. अम्बेडकर हुंदा आस्सेआ दस्से गेदे रस्ते उपपर चलने ते समाज दे इक बरोबर विकास लेई कम्म करने लेई आखेआ। प्रधानमंत्री होरें आखेआ जे डॉ. अम्बेडकर हुंदा विचार गी अगु बंधांदा होई अज्ज भारत दी नमीं छवि च बडी मती तब्दीली आई ऐ। जम्मू-कश्मीर दे उपराज्यपाल मनोज सिन्हा होरें बी इक सोशल मीडिया पोस्ट उपपर भारती संविधान दे निर्माता डॉ. भीमराव अम्बेडकर होरें गी श्रद्धांजलि भेंट कीती। उनें आखेआ जे समाजिक बरोबरी ते न्यांस आस्तै उंदे आस्सेआ कीतियां गेदियां अनथक कोशशां केई पीढियें गी प्रेरणा दिंदियां रौहडन।

<><><><><><>

BLO-Voter Slips

जम्मू-कश्मीर च संसदीय चुनावें आस्तै बहुबहु मतदान आस्तै चुनावें अधिकारियें बूथ सतह दे अधिकारियें गी मतदाताएं गी वोटर स्लिपां मतदान कोला 7 दिन पैहले देने लेई जिसलै के केंद्री सशस्त्र पुलिस बल ते जम्मू-कश्मीर पुलिस आस्सेआ फ्लैग मार्च कडुने लेई आखेआ ऐ। लोकें च सुरक्षा दी भावना बनाई रक्खने आस्तै रातीं बेल्लै नाके उपपर चैकिंग ते गश्त बधाने आस्तै बी आखेआ गेआ ऐ। बहुबहु मतदान गी यकीनी बनाने आस्तै अधिकारियें आस्सेआ एहू गैहू पुट्टी गेई ऐ। एहू वोटर स्लिपां लोकें तोड़ी आपूं पजाइयां जाडन तां जे मतदाता असानी कन्नै मतदान केंद्रें तोड़ी जाई सकै।

<><><><><><>

Centurian-Voters

जम्मू-कश्मीर दे पहाडी इलाका डोडा इतिहास च पैहला जिला बनन जा'रदा ऐ जित्थे 100 ब'रे शा बहु उम्री आहले 3 दर्जन शा बी मते लोक इस लोकसभा चुनावें च वोट पाडन। आकाशवाणी जम्मू संवाददाता हुंदा रिपोर्ट मुजब जिले च 100 बरे शा बहु उम्री दे 37 वोटर न, जेडे इस बारी दे चुनावें च अपने वोट पाने दे हक्क दा इस्तेमाल करडन। इनें 37एं शा सब्बनें शा मती उम्री दा वोटर 108 बरे दे'न। जिला चुनावें अधिकारी होरें इनें सब्बनें वोटरें लेई विशेष इंतजाम कीते दे न तां जे ओह बिना कुसा परेशानी दे अपना वोट पाई सकन।

<><><><><><>

Polling-Staff Training

उधमपुर च औंदी 19 तरीक गी होने आले लोकसभा चुनावें दे मद्देनजर चुनावें प्रशासन नै कठुआ च चुनावें अमले लेई इक ट्रेनिंग दा आयोजन कीता। इस दौरान सिखलाई देने आहले प्रमुख द्वारका प्रसाद होरें ई.वी.एम, बी.बी-पैट सिस्टम ते होर दुई लोडचदी जानकारी चुनावें अमले गी दित्ती। एहूदे बारै गल्ल करदे होई द्वारका प्रसाद ते नोडल अधिकारी अन्ना जम्वाल होरें गलाया।

<><><><><><>

Heroin

राजौरी जिले च 1 किलो शा बहु नशीला पदार्थ हेरोइन बरामद कीती गेई ऐ। इसी मलाइये 10 अप्रैल थमां लेइये अज्ज तगर 9 किलो शा बहु नशीले पदार्थ जब्त कीते गे'न। पुलिस दे मताबक राजौरी जिले दी नियंत्रण रेखा दे नेडे बन्नै पारां तस्करी करने आहले त्रऊं तस्करें गी 10 अप्रैल गी गिरफ्तार करी उंदे कब्जे शां 8 किलो शा बहु नशीला पदार्थ बरामद कीता गेआ। मकरी ग्रं

दे इक ग्रामीण रक्षा कमेटी दे मिम्बर नै च'ऊं संदिग्धें गी अगेत्रे ग्रां च इक झोला फडी घुम्मदे दिक्खेआ ते सबबनें गी चौकन्ना करी दित्ता। पुलस नै इनेंगी फगड़ने लेई तुरत कार्रवाई कीती पर इंदा इक जोड़ीदार नस्सने च कामाब होई गेआ। गिरफ्तार कीते गेदे तस्करें दे खुलासे उप्पर जंदी रातीं एह ताजा बरामदगी कीती गई ऐ। तोआई एसएसपी पुलस अमृतपाल सिंह होरें तस्करें गी नौजवान पीढी दा भविक्ख खराब नेई करने दी चेतावनी दित्ती ऐ।

<><><><><><>

Fire

अगग सालने आहले विभाग आस्सेआ अग्निशमन सेवा दिवस दे मौके पर अज्ज उनें जवानें गी श्रद्धांजलि दित्ती गई जिनें अगग सालने दे मिशन दौरान अपनी जिंदू दी परवाह नेई कीते विजन लोकें गी बहादुरी कन्नै बचाया। अगग सालने आहले विभाग फायर एंड इमरजेंसी सर्विस दे डरैक्टर ते एडीजीपी अलोक कुमार होरें अज्ज गांधी नगर हैडक्वार्टर च परेड दी अगुवाई कीती। इस दौरान बहादुर फायर फाइटरें दे बलिदान गी चेत्ता करी पुष्पांजलि भेंट कीती गई। इस बारे गल्ल करदे होई जम्मू-कश्मीर फायर एंड एमरजेंसी दे डीजी अलोक कुमार होरें गलाया।

<><><><><><>

JKDMA

जम्मू-कश्मीर आपदा प्रबंधन प्राधिकरण नै अगले 24 घंटे दौरान कश्मीर घाटी दी द'ऊं जिलें दी उच्चियें धारें उप्पर बर्फीले तूफान दी पेशनगोई कीती ऐ। जे.के.डी.एम.ए आस्सेआ जारी सलाह च गलाया गेदा ऐ जे अगले 24 घंटे दौरान उत्तरी कश्मीर दे कुपवाड़ा ते गांदरबल जिले च दरम्यानी सतह उप्पर बर्फीले तूफान दे खतरे दी शैंका ऐ। इनें इलाकें च रवा'रदे लोकें गी पूरी चाल्ली सौहगा रौहने ते बर्फीले तूफान दी शैंका आहले प्रभावित इलाकें च नेई जाने दी सलाह दित्ती गई ऐ। एहदे शा पैहले कश्मीर घाटी च पिछले 24 घंटे दौरान हल्की थमां दरम्याने दर्जे दी बरखा पेई सकदी ऐ ते उच्चियां धारें उप्पर होई दी ताजा बर्फबारी करी प्रशासन नै बर्फीले तूफान दी चेतावनी जारी कीती ऐ। प्रशासन नै लोकें गी कुसा बी आपातकालीन स्थिति च लोड़चदी मदाद लेई 112 नंबर डायल करने दी बी सलाह जारी कीती ऐ।

<><><><><><>